



gu

colu

lu





DE  
**LEGE VILLIA ANNALI**  
**MAGISTRATVVM ROMANORVM**  
**AMPLISSIMI PHILOSOPHORVM ORDINIS**  
**A V C T O R I T A T E**

**DIE XX. MARTII A. O. R. CIOCCCLXV.**

**DISPV TABIT**

**AVGVSTVS FRIDERICVS SCHOTT**

**DRESDENSIS**

**ARTIVM MAGISTER**

**R E S P O N S V R O**

**CAROLO AVGVSTO SCHLOCKWERDER**

**LOEBAVIA-LVSATO**

**LL. CVLTORE.**

---

**L I P S I A E**  
**EX OFFICINA LANGENHEMIA.**





§. I.

*Ratio tractationis.*



Cum scribendi nobis necessitas imposita videretur, latum literarum campum percurreramus, incerti, vbi consisteremus; tandem in Latio pedem fiximus. Habet namque antiquitatis indagatio tantam cum utilitatem, tum iucunditatem, ut nemo, qui paulo liberaliori animo est, illius amore non capiatur, quin abripiatur; quem vel propterea nos decere existimamus, quod istarum rerum scientia nostris inprimis studiis, quae Themidi potissimum consecrauimus, quam maxime digna esse videtur. De aetate igitur, quam singulis honorum gradibus conuenire, Quirites voluerunt, exponere instituimus. In quo quidem argumento tractando hanc nobis legem diximus, ut, de anno, quo uti toga virili, et militare Romani adolescentes coeperint, praefati, quid vetustissimis temporibus de legitima magistratuum aetate obtinuerit, eruamus, porro legis Villiae sententiam declaremus, et quo

anno singuli magistratus in vrbe capi potuerint, indicemus, faciem denique huius instituti, eversa republica, descripturi.

## §. II.

*Aetas togae virili capiendae sollemnis.*

Sapienter profecto Romani constituerunt, ne quis iuuenis, quacunque vellet aetate, negotiorum ut plurimum expers, ad rempublicam accederet, sed non nisi aetate confirmatus laboribusque praeparatus summos, in quibus gerendis et grauitas quam maxime cernitur, et industria, et virtus, honores capefferet. Nam et aetatem spectarunt eorum, qui vellent publicis negotiis se immiscere, et viam monstrarunt, quae duceret ad rempublicam, et gradus posuerunt, per quos adolescentes ad summos quosuis honores adscenderent. Quo facilius autem intelligi posset, quando quilibet commodis reipublicae inferuendi aptus censeretur, sollemni aliquo signo usi sunt, quod dignum iuuenem, qui publicis negotiis interesset, demonstraret. Nam quem e pueris dimittere vellent, eum, posita praetexta, omnique puerili vestitu abiecto, toga pura, quae virorum erat, amictum in forum sollemni pompa ducebant agnati, aptum iam forensibus rebus percipiendis ciuem significaturi. Quem quidem tirocinii ponendi ritum, cum alii satis copiose explicuerint, non moramur. At de anno aetatis, quo pueri Romani virilem togam ceperint, (quod argumentum cum nostra scriptione valde coniunctum est) paulo accuratior disputatio a nobis institui debet. Sunt enim diuersae doctorum virorum de hoc tempore sententiae. Quidam, ut, FERRARIUS, <sup>a)</sup> KEPLERUS, <sup>b)</sup> VALESIVS, <sup>c)</sup> ac imprimis

DODWEL-

a) Oſſau. FERRARIUS *de re vestiariar.* lib. II. c. I. ap. Graeu. T. VI.

b) KEPLERUS *de anno natali Christi*, cap. IO.

c) Henr. VALESIVS in *Not. ad Nic. DAMASCENVM de institut. Caesaris Augusti.*



DODWELLVS \*) exacto anno quarto et decimo, et ineunte quinto id factum esse contendunt. Prouocat FERRARIVS ad veterem interpretem Iuuenalis ineditum bibliothecae Ambrosianae, cuius haec verba affert: *Praetexta genus erat togae; qua utebantur pueri adhuc sub disciplina usque ad XV. annum; deinde togam virilem accipiebant: unde in Vita S. Germani legitur: Cessit praetexta togae.* VALESIVS vero omne sententiae suae praesidium in DAMASCENI<sup>d)</sup> fide quaerit, (quo argumento etiam utitur DODWELLVS) qui de Augusto scribit, eum annos circiter XIV. natum toga pura, virilis tirocinii argumento, indutum fuisse. At quemadmodum hic Iuuenalis interpres, quem post Carolum Caluum, cuius aetate Ericus, Vitae S. Germani ibi laudatae auctor, floruit, vixisse oportet, nihil omnino efficit contra veterum scriptorum auctoritatem vimque argumentorum ex historia Romana petitorum, quae mox commemorabimus; ita DAMASCENI de aetate Augusti virilem togam capientis errorem ex ipso DAMASCENI NORISIUS<sup>e)</sup> accurate demonstrauit. Hic enim ipse scribit, Augustum eodem die togam puram induisse, ac Pontificem creatum in locum L. Domitii, qui e viuis excefferat. Atqui natus est ille a. v. DCXCI. autumnii tempore, Domitius vero a. v. DCCVI. aestate occubuit. En igitur Augustum non prius, quam sub anni XVI. initium toga virili ornatum! Alii cum GRVCHIO,<sup>f)</sup> SALMASIO,<sup>g)</sup> atque MANVTIO,<sup>h)</sup> anno

A 3

demum

\*) DODWELLVS in *Praelect. Camden.* V. §. I—6. quamquam hic de folis principum temporibus intelligendus.

d) Nicol. DAMASCENVS de *institut. Caesaris Augusti*, in *Excerpt. Peiresc.* p. 477.

e) *Er. Henr. NORISI* *Cenotaph. Pisan.* Diff. II. c. 4.

f) *Nit. GRVCHIVS* de *comit.* lib. II. c. 3. ap. *Graeu.* T. I.

g) *Cl. SALMASIVS* ad *LAMPRIIDI vitam Commedi*, cap. II.

h) *MANVTIVS* in *Epist. de toga Rom.*

demum XVII. coepto eandem traditam arbitrantur, sed nullo fere idoneo argumento. Quid? CALVINVS<sup>i)</sup> usque ad annum XVIII. usum eius prorogat. Sed sit fides penes ipsum eiusque collegas clarissimos, lexicorum conditores. Magis placet NORISII<sup>k)</sup> opinio, qui BAYFIVM,<sup>l)</sup> SIGONIVM,<sup>m)</sup> et FABRICIVM<sup>n)</sup> secutus, media via ingressus est. Probat enim exemplis Ciceronum, patris<sup>o)</sup> et filii,<sup>p)</sup> Virgilii,<sup>q)</sup> Augusti,<sup>r)</sup> ac Galbae,<sup>s)</sup> pueros XV. anno expleto et XVI. inito togam puram accepisse. Nobis ita videtur, nulla quidem lege, attamen more annum XVI. togae mutationi praefinitum fuisse; neque adeo sancte illum servatum, quin ab eo interdum recesserint Romani. Certe Imperatores modo celerius, modo tardius filiis eam dederunt. De Nerone, qui Cn. Acerronio Proculo et C. Pontio Nigro Coss. a. v. DCCXC. XVIII. Kal. Ianuar. novem post Tiberii obitum menses in lucem venerat,<sup>t)</sup> TACITVS scribit: <sup>u)</sup> *Ti. Claudio V. et Ser. Corn. Orphitio Coss. (id est, a. v. DCCCIV.) virilis toga Neroni maturata, quo capeffendae reipublicae habilis videretur.* Caligulam vero vicesimo demum aetatis anno togam sumsisse, SVETO-

NIVS

i) CALVINVS in *Lexico* s. v. *toga*.

k) NORISIVS l. c.

l) *Lazar. BAYFIVS de re vestiar. ad tit. π. de auro et arg. leg. cap. X. ap. Græv. T. VI.*m) *Car. SIGONIVS de iudic. lib. III. cap. 19.*n) *Franc. FABRICIVS in Historia Ciceronis ad a. Cic. XVI.*

o) De quo vid. FABRICIVS l. c.

p) Natus est L. Iulio Caesare et C. Marcio Figulo Coss. a. v. 690. Togam ei dedit pater L. Corn. Lentulo et C. Claudio Marcello Coss. a. v. 705. CICERO *ad Attic. lib. I. ep. 2. et lib. IX. ep. 19.*

q) Natus est in priori consulatu Pompeii et Grassi a. v. 684. togam virilem sumsit in altero eorundem a. v. 699. ut narrat DONATVS in eius vita.

r) SVETONIVS in *Octav. cap. VIII.*s) Hunc natum esse ait SVETONIVS in *Galba* cap. IV. M. Valerio Messalla et Cn. Lentulo Coss. a. v. 751. IX. Kal. Ianuar. togam vero puram induit a. v. 767. ipsis Kal. Ianuar. teste DIONE *Hist. Rom. lib. LVI. c. 29.*t) SVETONIVS in *Tiberio* cap. LXXIII. et in *Nerone* cap. VI.u) TACITVS *Annal. lib. XII. cap. 41.*

NIVS<sup>x)</sup> auctor est. Legendus omnino NORISIUS, cui plurima debemus.

## §. III.

*Aetas militaris. Via ad honores.*

Induti autem iuvenes toga virili *tirones*<sup>a)</sup> dicebantur, quod mox apti censerentur militiae suscipiendae, quam detrectare non poterant, nisi ignominia notari ac inter aerarios referri vellent, cuiusmodi exemplum LIVIVS memoriae prodidit. \*) Ita enim iam ab Servio Tullio (TVBERONEM<sup>b)</sup> antecessor) sancitum erat, ut iuvenes ab anno XVII. milites scriberentur. Ante hunc annum vero militare nefas erat, \*\*) nisi extrema urgente necessitate, qualis bello Punico secundo contigit, ubi decretum est a senatu, ferrent tribuni plebis ad populum, ut, qui minores septem et decem annis sacramento dixissent, iis perinde stipendia procederent, ac si septem et decem annorum, aut maiores, milites facti essent. c) Quapropter, cum nonnulli, ambitione, ut videtur, ducti, quo citius ad honores venirent, ante id tempus militiae nomen dedissent, tulit C. Gracchus, tribunus plebis, legem, *νεωτερον ἑπτα καὶ δέκα ἔτων μὴ καταλεγεσθαι στρατιωτην.* d) Incipiebat igitur aetas militaris cum ipsa pubertate. Vnde recte VEGETIVS scribit: e) *Si antiqua consuetudo servanda sit, incipientem pubertatem ad dilectum cogendam.* AC SILIVS<sup>f)</sup>:

*Pubescit*

x) SVETONIUS in *Caligula*, cap. X.

a) Idem in *Nerone* cap. VII.

\*) LIVIVS lib. XXVII. cap. 28.

b) Apud GELLIVM *Noct. Attic.* lib. X. cap. 28.

\*\*) Quare non consentimus cum DODWELLO, qui in *Praelect. Camden.* V. §. 9. et X. §. 9. 10. statim a deposita praetexta militasse Romanos, statuit, quod ne de prin-

cipum quidem temporibus concederem, ubi nihil plane certi obtinuit, siquidem omnia tum turbata.

c) LIVIVS lib. XXV. cap. 5.

d) PLVTARCHVS in *Vita Graccharum.*

e) VEGETIVS *de re milit.* lib. I. cap. 4. ibique STEWECHIVS.

f) SILIVS *Italicus de bello Pam. Sec.* lib. II. v. 318. sq.

*Pubescit miles castris, galeaque teruntur  
Nondum signatae flaua lanugine mælae.*

In quibus locis miror LIPSIUM<sup>g)</sup> hæcisse, horum auctorum incuriam accusantem, quod nec decimus septimus annus initium sit pubertatis, nec impuberes ad arma veniant. Scilicet non cogitavit, aliam pubertatem plenam esse, aliam minus plenam; hanc XIV. illam XVIII. annis finiri. De postrema, non de priorē, vtriusque verba interpretanda. Illud vero inprimis declarat Romanorum sapientiam, quod neminem fere ciuilibus negotiis expediendis idoneum iudicarunt, nisi in castris versatum ac virtute insignem, quae armorum praesertim exercitatione ac in ipsa militia comparatur. Ac ne militasse quidem omnino sufficiebat, sed certum militiae tempus definitum erat iis, qui vrbanos magistratus capere vellent. Hos enim appetentem decem stipendia confecisse oportebat, vt auctor est POLYBIUS his verbis: <sup>h)</sup> Πολιτικὴν δὲ λαβεῖν ἀρχὴν οὐκ ἔξεστιν οὐδενὶ προτέρων, εἰ μὴ δέκα στρατείας ἐνιαυσίους ἢ τετελεώς. Ante annum igitur XXVII. nulla consequendorum honorum spes. Quae tamen verba caute explicari debent. Nam primum ad solos superiores magistratus pertinent, non ad inferiores, quales erant Vigintiuiratus et Praefectura vrbis Latinarum feriarum causa, quos multum ante XXVII. annum captos fuisse, postea demonstrabimus, cum de vtroque dicemus. Deinde POLYBIUS de iis tantum dixisse videtur, qui per militiam ad honores euehi vellent. Non enim persuadere nobis possumus, hanc vnam viam fuisse capeendi rempublicam, sed duplicem potius ad honores adspirantibus propositam arbitramur, militiam alteram, alteram inferiorum quorundam magistratuum administrationem. Iuuat hanc nostram opinionem vel maxime

TACITI

g) *Iust. LIPSIUS de milit. Rom. lib. I. Dial. II.*

h) *POLYBIUS Histor. lib. VI. cap. 17.*

TACITI locus: <sup>i)</sup> *Per idem tempus* (de Tiberio loquitur) *Neronem e liberis Germanici iam ingressum iuventam, commendavit patribus, utque munere capeffendi Vigintiuiratus solueretur, et quinquennio maturius, quam per leges, Quaesturam peteret, non sine inrisu audientium postulavit.* Ac alius DIONIS, qui de Claudio: *Τους γὰρ βρούς, inquit, <sup>k)</sup> τότε ἐν τοῖς ἑικοσὶ ἀνδράσιν ἀρχαί, καὶ μετὰ τοῦτο πολιαρχήσαι ἐν ταῖς ἀνοχαῖς, ἐκέλευε, καὶ ὡς περὶ πεντὲ ἔτεσι θάσσον τὰς ἀρχὰς αἰτήσαι σφισὶν ἐπέτρεψε.* Ex quibus satis apparet, munus Vigintiuiri aditum ad superiores honores aperuisse. Aut igitur militandum erat ei, qui ad rempublicam accedere volebat, aut inferiora quaedam munera subeunda. Vtrumque sane nemo potuit. Postremam praeterea viam citius militia ad honores duxisse, ex eo coniicimus, quod annus aetatis XXV. tamquam legitimus Quaesturae non vno exemplo significatur. Ita sane tolles dissensum doctorum virorum, qui de iusto Quaesturae anno disputarunt. Sed satis de his. De ipsis legibus, quae aetatem magistratuum definiuerunt, nunc dicendum.

#### §. IV.

*Incertum, quid ante legem Villiam latam obtinuerit.*

Initio quidem reipublicae Romanae, cum non aetas, sed sola virtus rerumque gerendarum peritia intribuendis honoribus spectaretur, nihil de lege annali auditum. Nam *apud maiores, inquit TACITVS, <sup>a)</sup> virtutis id praemium fuerat, cunctis ciuium, si bonis artibus fiderent, licitum petere magistratus; ac ne aetas quidem distinguebatur, quin prima iuuenta consulatum ac dictaturas inirent.* Itaque etiam magnae indolei adolescentulis summi honores tum patuerunt. At postea, cum indi-

<sup>i)</sup> TACITVS *Annal.* lib. III. cap. 29. vbi videndus LIPSIVS.

<sup>k)</sup> DIO *Hist. Rom.* lib. LX. cap. 5.

<sup>a)</sup> TACITVS *Annal.* lib. XI. cap. 22.



indignissimi quivis, ut videtur, iuvenes ad honores ruerent, numerusque candidatorum, qui virtute aequales, aetate diffimiles erant, augeretur, ambitio leges annales attulit, ut scribit CICERO, <sup>b)</sup> ut gradus essent petitionis inter aequales. Quando autem primum ea de re aliquid latum fuerit, valde dubitatur. Primum legem annalem tulisse L. Villium, tribunum plebis, LIVIVS vult. <sup>c)</sup> At ipse hoc euertere videtur, cum de P. Corn. Scipione Africano (ultra triginta ante legem Villiam annos) scribit, huic aedilitatem petenti obstitisse tribunos, negantes, rationem eius habendam, cui nondum ad petendum legitima aetas esset. <sup>d)</sup> Vnde patet, iam tum de aetate magistratum aliquid constitutum fuisse. Nam legitimum est, quod lege definitum. Accedit, CICERONEM <sup>e)</sup> atque OVIDIUM <sup>f)</sup> *leges annales* multitudinis numero appellare. Ergone LIVIVS erroris ac negligentiae arguendus? Ego profecto non ausim. Forte iam antea per partes de quorundam magistratum aetate ferri coeptum, licet anni ipsi non accurate definirentur, quae omnia lex Villia iunctim postea complexa, et annos ipsos singulis honorum, curulium inprimis, gradibus accuratius praescribens, reliquas aboleuit, vnde ab LIVIO haud ineleganter *prima* vocatur: quae est coniectura doctissimorum virorum, PIGHII, <sup>g)</sup> LIPSII, <sup>h)</sup> MERVLAE, <sup>i)</sup> S. V. ERNESTI, <sup>k)</sup> praeceptoris nostri summa pietate prosequendi, DVKERI, <sup>l)</sup> aliorum, eaque verisimillima. Ita sane

LIVIO

b) CICERO *Philipp.* V. cap. 17.

c) LIVIVS lib. XL. cap. 44.

d) LIVIVS lib. XXV. cap. 2.

e) CICERO *Philipp.* V. cap. 17.f) OVIDIVS *Fast.* lib. V. v. 65, 66.g) Steph. Vin. PIGHIVS in *Annal. Rom.* ad a. 573.h) Inst. LIPSIVS *de magistrat. vet. pop. Rom.* cap. IV.i) Paul. MERVLA *de legib. Rom.* cap. XXIV. §. 34. in *Oper. var. postb.* LB. 1684. 4. et in Io. POLENI *Supplm. utr. Thes. Ant.* T. I.k) S. V. Io. Aug. ERNESTI in *Clau. Cicer. Ind. LL.* f. v. *Annales.*l) DVKERVS *ad Livium* lib. XL. cap. 44.

LIVIO succurrendum. Neque tamen adeo refragabimur, si quis cum DVKERO<sup>m)</sup> (nam hic variat) statuere velit, tribunos plebis Scipioni ideo obstitisse, quia ante legem Villiam hoc solum cautum fuerit, ne quis vllum magistratum ante caperet, quam dena stipendia meruisset, quae Scipio tum propter aetatem non absoluerat; vel HEINECCIO<sup>n)</sup> adstipulari, maiorem XXV. annis aetatem per legitimam hoc loco intelligenti; vel denique BYNKERSHOECKIVM<sup>o)</sup> sequi, existimantem, ante haec tempora vnam eandemque aetatem omnibus honoribus fuisse praescriptam, siue legibus, siue moribus, postea Villium annos definiuisse in singulis magistratibus, ut maiorem minoremue prudentiam postularent. Quorum omnium opiniones DRAKENBORCHIVS<sup>p)</sup> collegit. Nos quidem in tanta coniecturarum multitudine nihil definire audeamus, praeter hoc, iam ante legem Villiam aliquid de aetate magistratum sancitum fuisse, cuius memoria ad nos haud peruenit.

## §. V.

*Lex Villia.*

Paulo certior erit de lege Villia disputatio, cuius et auctor spectari debet, et aetas, et cognomina. Auctorem si quaeris, audies alios *Villium* vocantes,<sup>a)</sup> (et hi quidem recte) alios *Iulium*,<sup>b)</sup> alios *Iunium*.<sup>c)</sup> Omnes prouocant ad L.

B 2

VIVM,

m) DVKERVVS *ad Liu.* XXV. 2.  
n) Io. Gottl. HEINECCIUS in *Comment. ad Leg. Iul. et Pap. Popp.* lib. II. cap. VII. §. 3. p. 203.

o) Corn. van BYNKERSHOECK *Observ.* lib. VI. cap. 17.

p) DRAKENBORCHIVS *ad Liiii* lib. XL. cap. 44.

a) v. c. Paul. MANVTIVS *de legib. Rom.* cap. VI. Ant. AVGVSTINVS *de legib. Rom.* f. v. *Villia annalis*, ap. *Graeu.* T. II. MERVLA l. c. FIGIVS

l. c. SIGONIVS, DVKERVVS, et DRAKENBORCHIVS *ad Liu.* XL. 44. *Chr. Gudofr. HOFFMANNVS in Hist. Iur.* Vol. I. P. I. p. 199. S. V. ERNESTI l. c. et quamplurimi viri docti.

b) In quorum numero sunt: Nic. GRVCHIVS *de comit. Rom.* lib. I. cap. 3. ap. *Graeu.* T. I. et *Iust. LIPSIVS de Magistrat. Rom.* cap. IV.

c) Vt Vlr. ZASIVS in *Catal. Leg. ant.* f. v. *Iunia annalis*.

VIVM, cuius de ista rogatione haec sunt verba: <sup>d)</sup> *Eo anno rogatio primum lata est ab L. Villio*, (alias legitur *Iulio*, aut *Iunio*, inde omnis dissensus) *Tribuno plebis, quot annos nati quemque magistratum peterent caperentque*. Omnes librorum auctoritatem prae se ferunt, in quibus diuersa huius nominis est scriptura. Attamen eos solos probos esse, qui *Villio* habent, ceteros indoctorum librariorum culpa deprauatos, viri doctissimi monuerunt. <sup>e)</sup> Floruit sane Romae gens *Villia*, et plebeia, et gestis honoribus insignis, ut videre est apud GLANDORPIVM. <sup>f)</sup> Et a COELIO <sup>g)</sup> *L. Villius* quidam *Annalis* commemoratur, prosapia auctoris legis nostrae, ut ex cognomine intelligitur. <sup>h)</sup> Non igitur est, quod dubitemus, *L. Villium Tappulum*, (id enim *Villiis* agnomen \*) *Tribunum plebis*, legem annalem tulisse. Quae quidem res ei tanto cessit honori, ut et ipse, et eius familia *Annales* inde appellarentur, ut LIVIVS refert. <sup>i)</sup> Idem nos docet tempus, quo facta est haec rogatio, dum A. Posthumium Albinum et C. Calpurnium Pisonem huic anno consules adsignat, <sup>k)</sup> qui a. v. DLXXIII. fasces tenuerunt, aut, ut alii malunt, a. v. DLXXIII. licet hoc leuissimum et quod a fastorum diuersitate proficiscitur. Varia denique sunt, quibus haec lex insigniri solet, cognomina. Nam quia annos, quibus singulos magistratus petere fas esset, definiuit, *annalis* vocatur, quod vocabulum ceteris est vltimius, et passim apud CICERONEM occurrit, nec non *annaria*,  
 VT

d) LIVIVS lib. XL. cap. 44.

e) MERVLÀ, PIGHIVS, SIGONIVS l. c.

f) Io. GLANDORPII *Onomasticon Histor. Rom.* f. v. *Villii*.

g) COELIVS ad *Cicer.* lib. VIII. ep. 8.

h) Ergo *L. Tullius* ille *Annalis* apud VALERIVM MAXIMVM lib. IX.

cap. II. scribarum vitio extat, licet in multis libris *Villius* legatur.

\*) Alius *L. Villius Tappulus*, *Aedilis plebis*, qui ultra XXX. annos ante nostrum floruit, occurrit apud LIVIVM lib. XXV. cap. 2.

i) LIVIVS l. c.

k) Idem lib. XL. cap. 35.

vt ab FESTO<sup>l)</sup> atque LAMPRIDIO.<sup>m)</sup> Et cum ita comitiorum licentiae fraenum iniectum fuerit, *comitialis* audit apud PACATVM.<sup>n)</sup> Iam vero de argumento huius legis exponamus, necesse est, quod circa aetatem magistratuum versari LIVIVS auctor est,<sup>o)</sup> licet annos ipsos ea definitos omiserit, aliunde eruendos. Itaque aetatem legitimam in singulis honorum gradibus demonstraturi primum de anno Quaesturae dicemus.

## §. VI.

*Aetas Quaesturae.*

Antea vero, quam annum aetatis, quo Quaesturam petere ac capere fas erat, definiamus, quaerendum videtur, vtrum de primo hoc honorum gradu lege annali aliquid cautum fuerit? Nam sunt, qui solis curulibus magistratibus eam vindicant, quorum agmen MANVTIVS<sup>a)</sup> ducit, hanc ob causam ab LIPSIUS<sup>b)</sup> notatus. Sed age, mi MANVTI, videamus, cur haec tibi sedeat sententia? Vagae ac incertae virorum doctorum de aetate Quaestoris legitima opiniones eam suaserunt? Quasi id semper falsum sit, de quo certatur! Ita nulla omnino veritas. Varia Quaesturae diuerso tempore gestae exempla<sup>c)</sup> confirmarunt? Haec autem nihil efficiunt, quam, quod ipse intelligis, liberum fuisse annum petitionis, modo ea non fieret ante annum XXVI. initum: Ita sane in omnibus magistratibus. Hos enim non statuto tempore necessario peti, sed non ante defi-

B 3

nitum

l) FESTVS *de Verb. Sign.* f. v. *An-  
naria.*

m) LAMPRIDIUS in *Vita Commo-  
di*, cap. II.

n) LATINVS PACATVS in *Panegy-  
r. Theodos.* cap. VII.

o) LIVIVS lib. XL. cap. 44.

a) MANVTIVS *de legib. Rom.* cap.  
VI.

b) LIPSIVS *de magistrat. pop. Rom.*  
cap. V. et *ad Tacit. Annal.* lib. III.  
cap. 29.

c) Vt, vtriusque Gracchi, qui anno XXVII. Cato Uticensis, qui anno XXIX. Cicero, qui anno XXXI. C. Iul. Caesar, qui anno XXXIII. eam gesserunt.

nitum annum capi, leges annales voluerunt. Vrges grauissimum C I C E R O N I S testimonium, qui de Cn. Pompeio M. anno XXXVI. vt probas, Consulatum gerente: *Quid tam singulare, inquit, <sup>d)</sup> quam vt ex Scto legibus solutus, Consul ante fieret, quam vllum alium magistratum per leges capere licuisset?* Atqui primus magistratus, qui post annum XXXVI. capi poterat, erat Aedilitas curulis. Quid ergo clarius, quam Quaesturam cum Aedilitate et Tribunatu plebis legibus annalibus excludi? Sed dixit haec C I C E R O orator, qui, quo maiorem Pompeii admirationem excitaret, omiſſa inferiorum ac plebeiorum honorum mentione, magistratum appellatione solos curules, tamquam per eminentiam, complexus est, vt indicaret, singulare esse in Pompeio, eum supremum curulium honorum gradum iam tum nactum fuisse, cum alias ne infimum quidem eorum capere liceret. Caue igitur, ne pro certis argumentis meras vendas coniecturas. Nos quidem, ni forte nimis nobis placemus, certiora habemus, quae tibi opponamus. Dicat pro nobis testimonium T A C I T V S, <sup>e)</sup> qui de Tiberio Neronem patribus commendante: *Et quinquennio maturius, quam per leges, Quaesturam peteret, — postulauit.* Nec denegabit, credo, hoc officium Q V I N C T I L I A N V S, cuius haec sunt: <sup>f)</sup> *Caluus, Caesar, Pollio, multum ante Quaestoriam omnes aetatem grauissima iudicia susceperunt.* Clarissime quoque S V E T O N I V S ita: <sup>g)</sup> *Germanicus — Quaesturam quinquennio ante, quam per leges liceret, — gessit.* Denique S P A R T I A N V S ait, <sup>h)</sup> *Iulianum Quaestorem ante annum, quem legitima aetas lineret, designatum*

d) C I C E R O *pro lege Manilia*, cap. XXI. de quo loco consulendi G R A E V I V S in *Not.* et G R V C H I V S de *Comit.* lib. I. cap. 3.

e) T A C I T V S *Annal.* lib. III. cap. 29.

f) Q V I N C T I L I A N V S *Institut. Orat.* lib. XII. cap. 6.

g) S V E T O N I V S in *Vita Caligulae*, cap. I.

h) S P A R T I A N V S in *Vita Iuliani*, cap. I.



tum esse. Hæc vero luculentissima testimonia cum inspexerit, quis dubitet, legem annalem etiam ad Quaesturam pertinuisse? Iam nouum oritur bellum de legitimo Quaesturae gerendae anno, cui nos non ideo immiscemus, ut nostram forte interponamus auctoritatem, (nam quae turpior iuuenis literis leuiter imbuti licentia, quam arbitrum agere velle, vbi vtrunque pugnant viri doctissimi, et qui principatum tenent in literaria republica?) sed quia officium nostrum ita postulare videtur. Placet nempe aliis annus aetatis XXXI.<sup>i)</sup> aliis XXV.<sup>k)</sup> aliis denique XXVII.<sup>l)</sup> Nos vero non hoc agemus, ut harum aliquam sententiam audacter impugnemus, sed argumenta, quibus quaelibet nititur pars, bona fide indicabimus, et, quae forsan obstare videbuntur, dubia proponemus. Qui primum et tricesimum annum legitimum Quaesturae adsignant, illustre Ciceronis exemplum producunt, quem valde gloriatum esse aiunt, se omnes magistratus *suo anno*, h. e. lege annali definito, gessisse. Quaestorem vero ipsum fuisse annos XXXI. natum constat.<sup>m)</sup> Vnde colligunt, hunc aetatis annum Quaesturae capiendae praescriptum fuisse. Sed miramur, quod CICERO non nisi de solo Consulatu praedicauit,<sup>n)</sup> id ad omnes magistratus ab eo gestos trahi

a viris

i) Ut, PIGHIVS in *Annal.* ad a. 573. T. II. p. 334. aliique viri, etiam doctissimi.

k) LIPSIVS in *Exc. ad Tacit. Annal.* lib. III. c. 29. et *de magistrat. Rom.* c. V. CASAVBONVS ad *Spartiani Vitam Adriani*, c. II. BULENGERVS *de Imper. Rom.* lib. III. c. 15. RUPERVS in *Animaduers. in Pomponii Enchirid.* lib. II. c. 8. DODWELLVS in *Praelect. Camden.* X. §. 8. et 14. GRAEVIUS in *Not. ad Cicer. Or. p. lege Manil.* cap. XXI. CAMPANVS *de off. et potest. magistrat. Rom.* p. 34. 35. et 203.

l) ZAMOSCIVS *de Senatu Rom.* cap. VIII. GRVCHIVS *de comit. Rom.* lib. I. c. 3. ROBORELLVS *de gradib. honor. et magistrat. Rom.* ap. Graen. T. III. PATRICIVS *de re milit. Rom.* P. I. Sect. 3. ibid. T. X. MERVLA *de Legib. Rom.* cap. XXIV. §. 34. SIGONIVS *de ant. iure ciu. Rom.* lib. II. c. 2.

m) Conf. COKRADI *Quaestura*, P. I. p. 46. edit. Ernest. et FABRICII *Histor. Cicer. ad a. Cicer. XXXI.*

n) CICERO *Or. Agrar.* II. cap. 2.

a viris doctis, quamquam ne hic quidem de aetate Consulatus legitima, sed potius de interuallo Praeturam inter ac Consulatum interiecto interpretandus. Petiit Cicero primum honoris gradum serius, quam licebat, quoniam et nouus homo erat, et artis eloquendi addiscendae gratia vsque ad hoc tempus in Asia commoratus, cum non nisi anno ante petitionem reuersus domum in publicum prodire et nobiliores causas agere coepisset. Ac licet de omnibus suis honoribus locutus esset Cicero, id tamen vix de aliis, quam de curulibus, valeret, nedum de Quaestura, quae, vt infimus honorum gradus et quasi via ad reliquos, <sup>o)</sup> scire non connumerabatur. Sic TACITVS Olliurn, etsi iam Quaestorium, honoribus nondum functum, scribit. <sup>p)</sup> Obstant praeterea huic opinioni grauissima illorum argumenta, qui annum XXVII. Quaesturae definiunt. Est namque locus apud POLYBIUM, <sup>q)</sup> cui vix aliquid possis opponere, vnde intelligimus, neminem potuisse vrbantum capere magistratum, nisi qui decem stipendia confecerit. Ante annum vero XVII. neminem militasse, supra probauimus. Quid igitur certius, quam annum aetatis XXVII. legitimum fuisse honorum capiendorum? Primus autem honorum gradus fuit Quaestura. Hanc ergo, quisquis anno XVII. coeperat militare, anno XXVII. capere potuit. Quae dixit contra LIPSIVS, <sup>r)</sup> tam leuia sunt, vt vix egeant responsione. Nam quod ait, vix credibile esse, ratam et firmam in republica fuisse Polybianam hanc legem, siue morem, cum nemo praeterea eius meminerit, hoc tanto viro plane indignum dictum arbitramur. Quis vnquam de POLYBII fide dubitauit? An maior LIPSII, quam POLYBII auctoritas? Nonne plus valet, quod vnus scriptor fide dignus prodidit,

o) Conf. GVLIELMVS *de magistrat. pop. Rom.* cap. XII. ap. Sallengr. T. III.  
p) TACITVS *Annal.* lib. XIII. c. 45.

q) POLYBIVS *Histor.* lib. VI. c. 17.  
r) LIPSIVS *de magistrat. Rom.* cap. V.

didit, quam quod decem alii leuis notae homines compilarunt? Si nihil credere velimus, quam quod centum alii affirmauerint, quam misera erit historiae facies! Deinde quod haec verba non de militia coacta ac de delectu, sed de voluntaria accipienda censet, neminem scilicet inuitum ante XVII. annum militem legi debuisse, nobiles tamen et eos, qui alerentur in spem honorum, militiae et castris iam ante hoc tempus, quid? statim a toga pura ita interfuisse, vt inde eorum stipendia numerarentur, existimans, id quidem moribus Romanis prorsus repugnat. Versatos saepe esse etiam ante XVII. annum pueros in castris ac contubernio viri alicuius illustris, facile largior, at processisse his statim ab hoc tempore stipendia, hoc nego ac pernego. Erat enim haec firmissima Romae lex, neminem ante annum XVII. inuitum legitima stipendia facere posse. Hinc, cum aliquando, extrema urgente necessitate, iuniores XVII. annis ad arma vocarentur, opus erat lege Tribunorum plebis, vt illis perinde stipendia procederent, ac si XVII. annorum, aut maiores, milites facti essent. <sup>3)</sup> Nihil igitur impedit, quo minus POLYBIVM de militia coacta interpretemur. Ne autem quis nostram de legitimo Quaesturae anno sententiam exemplis destitui opinetur, Gracchos fratres in memoriam reuocamus, quorum vterque anno aetatis XXVII. Quaesturam gessit, auctore PLVTARCHO. <sup>4)</sup> Quod autem multi serius eam adepti sunt, triplex videtur esse causa. Aut enim non statim ab anno XVII. militauerant: aut noui forte homines non nisi temporis diuturnitate in fauorem populi venire poterant: aut, cum patricii essent, nolebant minores magistratus praecipitare, ne nimis illis expectandum esset, donec maiores capere possent. Nam qui patricius Quaestor fuerat, nullum proximiorum, Aedilitate curuli, magi-

<sup>3)</sup> LIVIVS lib. XXV. cap. 5.

<sup>4)</sup> PLVTARCHVS in *Vita Gracchorum*.

magistratum petere poterat, quam anno demum XXXVI. expleto fas erat capeßere. Aliud in plebeiis, quibus post Quaesturam etiam Aedilitatem plebis et Tribunatum plebis ante Aedilitatem curulem gerere licebat. Ita rationes subduxit GRVCHIVS. <sup>u)</sup> Restat, vt de eorum dicamus sententia, qui iam anno aetatis XXV. Quaesturam capi licuisse arbitrantur, quorum antesignanus est LIPSIVS, <sup>x)</sup> qui triplici vtitur argumento. Primum a ratione ductum dicit, quod anno aetatis XXV. virilis vigor compleatur, vt cénset VLPIANVS. <sup>y)</sup> Tunc igitur iuuenes iure aptos cenferi ad res publicas et priuatas. Quo tamen nescio an quid dici possit insulsius? Alterum captum ab aetate senatoria, quam anno XXV. definit. Nam cum Quaestura primus gradus sit in Senatu, colligit inde, eundem Quaesturae, ac senatoriae dignitatis, annum esse legitimum. Sed etiamsi LIPSIO concesserimus, annum XXV. fuisse aetatem senatoriam, (quamquam hoc valde dubium, certe libera republica, vt recte visum SIGONIO <sup>z)</sup> ac CAMPIANO <sup>aa)</sup> itemque ZAMOSCIO <sup>\*)</sup>) vix tamen nobis persuadere possumus, illum hinc recte suam adornasse sententiam. Scimus enim, non eos solos, qui magistratus gesserant, lectos fuisse in Senatum, verum alios etiam ex equestri ordine nondum functos honoribus. Ac his quidem solis certus annus praescriptus videtur, ne admodum iuuenes Senatores fierent. Certe in iis, qui iam honores gesserant, opus non erat. Nam qui idoneus fuerat magistratibus administrandis, quidni talis Senator esse posset? Magis stringit vltimum, quod in exemplis positum est, vbi inprimis Tiberium proponit, qui Quaestor designatus est XIX. aetatis anno,

VEL-

u) GRVCHIVS l. c.

x) LIPSIVS locis laud.

y) VLPIANVS lib. II. *ad Edict.*  
in cap. I. π. *de minor. XXV. ann.*

z) SIGONIVS l. c.

aa) CAMPIANVS l. c.

\*) ZAMOSCIVS *de Senatu Rom. cap.*  
VIII.

VELLEIO teste, <sup>bb)</sup> at tum quidem quinquennio maturius, quam per leges licebat, quod DIO <sup>cc)</sup> aperte indicat. Ex quo haud obscure putat intelligi, annum XXV. legitimum esse Quaesturae. Et habet sane hoc argumentum tantam vim, quae rapiat, quantum illud ex POLYBIO peritum, quo annum XXVII. stabiliuimus. <sup>dd)</sup> An igitur vtrumque verum, et XXV. et XXVII. annos legitimos fuisse Quaesturae gerendae? Ita videtur. Nostra scilicet sic est ratio. Diximus antea, <sup>ee)</sup> et, ni fallor, probauimus, duplicem viam Romae ad honores duxisse, militiam, et inferiorum quorundam magistratuum administrationem, ac POLYBII quidem verba de sola militia capienda esse. Si autem diuersa fuit via, quid probabilius, quam diuersam quoque fuisse aetatem legitimam, ita quidem, vt alio anno iis, qui militiam secuti erant, alio iis, qui inferiores quosdam magistratus, velut Vigintiviratum et Praefecturam vrbis Latinarum feriarum caussa, gesserant, ad superiores honores, quorum primus erat Quaestura, adspirare licuerit? Non absque ratione igitur coniicimus, eos, qui per militiam ad honores peruenire vellent, ante annum XXVII. Quaesturam capere non potuisse, siquidem decem stipendia eos absoluisse oporteret, POLYBII fide, quae demum ab anno XVII. currebant, at illos, qui togata virtute, quae in gerendis inferioribus magistratibus quam maxime conspiciebatur, inclarescere cuperent, biennio citius, et iam anno aetatis XXV. primum hunc honorum gradum, cum peterent, adeptos fuisse. Ita vero vtraque stat sententia. Neque tamen, per nos licet,

C 2

inepte

bb) VELLEIVS PATERCVLVVS  
*Histor. Rom. lib. II. c. 94.*

cc) DIO lib. LIII.

dd) Sic Adrianus Quaesturam an-

no XXV. gessit. Conf. CASAVBONVS  
*ad Spartiani Adrian. cap. II. et DOD-*  
*WELLVS in Praelect. Camden. X. §. 8.*

ee) Conf. §. III.



inepte dixeris, sub principibus, aut paulo ante lege aliqua (forte Pinaria, de qua postea) introductum fuisse, ut Quaesturam anno XXV. capere liceret. Sed haec omnia ita a nobis dicta esse volumus, ne summorum virorum iudicio detraxisse quid videamur.

### §. VII.

#### *Aedilitas plebis.*

Iungimus Quaesturae Aedilitatem plebis, quae a solis plebeiis hominibus, ut Tribunatus plebis, capi poterat. Cuius annum legitimum inuenire difficilis res est. Fuit sane diuersus ab anno Aedilitatis curulis, licet LIPSIUS<sup>a)</sup> vtrumque misceuerit. Nam inter Quaesturam et Aedilitatem curulem hi duo plebei magistratus interiici solebant. Tribunatum plebis verisimillimum est, anno XXX. capere licuisse, ut mox apparebit. Atqui hanc Aedilitas plebis praecessit. Huic igitur annum XXVIII. legitimum adsignare non dubitamus. Sed redit res ad coniecturam, cui immorari nosas putamus.

### §. VIII.

#### *Tribunatus plebis.*

Aedilitatem plebis sequitur Tribunatus plebis, non vero statim Quaesturam, ut censet ROBORELLVS.<sup>a)</sup> Aedilitatem enim ante Tribunatum captam fuisse, ex eo apparet, quod maior erat Tribuni, quam Aedilis plebis dignitas atque potestas, siquidem maior magistratus semper excipit minorem. In ipso autem anno Tribunatus definiendo ab LIPSI<sup>o</sup> dissentimus, qui vicesimum septimum, aut octauum fuisse, sine ratione scribit.<sup>b)</sup> Nobis quidem magis placet annus XXX. quo vterque Gracchus fuit Tribu-

a) LIPSIUS *de magistrat.* cap. V.

b) LIPSIUS l. c.

a) ROBORELLVS *de grad. honor. et magistrat. Rom.* ap. Graeu. T. III. p. 45.

Tribunus, quos legitima aetate hunc honorem gessisse, inde fit probabile, quod iidem Quaestura anno XXVII. tamquam legitimo functi fuerunt. Qua in re nobiscum consentiunt GRVCHIVS<sup>c)</sup> et MERVLA,<sup>d)</sup> cuius egregii (vt sunt illius reliqua) de magistratibus Romanis commentarii, qui adhuc in tenebris latent, si in lucem prodissent, plura forte ac doctiora, quibus haec sententia firmaretur, haberemus argumenta.

## §. IX.

*Aedilitas curulis.*

Sequuntur curules honores, quorum infimus est Aedilitas curulis, quam quo anno genere licuerit, constat certius. Indicat eum nobis suo exemplo minor Scipio Africanus Aemilianus, dictus Numantinus, qui Aedilitatem petens, quam per aetatem capere poterat, Consulatum, cui nondum maturus erat, a populo legibus solutus obtinuit.<sup>a)</sup> Is vero tum egit XXXVII. annum, vt probat MANVTIVS.<sup>b)</sup> Vnde haud obscure intelligitur, hanc fuisse legitimam Aedilitatis curulis aetatem. Hoc autem valde mireris, quod GRVCHIVS Liuii Epitomatores reprehenderit, quasi hic affirmauerit,<sup>c)</sup> defuisse tum Scipionis aetati decem annos ad Consulatus petitionem, cum tamen non nisi quinque defuerint. Nos sane quouis pignore contenderemus, GRVCHIVM memoriae nimis fidentem eius verba plane non infpexisse. Diuersa sunt loca, diuersum vtriusque argumentum. Nam in priori de primo Scipionis Consulatu loquitur, quem aetate aedilitia obtinuit, in posteriori de altero eiusdem, quem cepit nondum expleto decem annorum spatio, quod inter duos eiusdem hominis Consulatus intercedere debebat, ex lege ve-

C 3

teri.

c) GRVCHIVS l. c.

d) MERVLA l. c.

a) *Epitom. Liuii* lib. L.b) MANVTIVS *de Legib. Rom.* cap. VI.c) *Epitom. Liuii* lib. LVI.

teri. Ita enim scribit Epitomatōr: *Delatus est ultro Scipioni Africano a Senatu populoque Romano Consulatus, quem cum illi capere ob legem, quae vetabat quemquam intra decem annos iterum Consulem fieri, non liceret, sicuti priori Consulatu, legibus solutus est.* Eadem aetate et Cicero gessit Aedilitatem, de qua ipse passim scribit.<sup>d)</sup> Alterum aetatis aedilitiae indicium praebet legitimorum Praeturae ac Consulatus annorum computatio. Scimus namque, integrum semper biennium inter duos magistratus curules interiectum fuisse, ita, vt, si quis v. c. Praeturam gessisset, is duobus demum annis praeterlapsis Consulatum petere potuerit.<sup>e)</sup> Quodsi igitur a Consulatu, quī anno XLII. peti et XLIII. geri poterat, ad Praeturam biennium retro numeraueris, reperiēs, Praeturae gerendae annum legitimum XL. fuisse, vt petendae erat XXXIX. Porro si totidem annos inter petitionem Praeturae et tempus, quo Aedilis esse licebat, interpositos obseruaueris, efficitur, Aedilitatem curulem capi potuisse anno XXXVII. peti vero sexto et tricesimo. Haec si LIPSIVS obseruasset, non tanta cum fiducia annum XXVII. aut XXVIII. huic magistratui attribuisset.

### §. X.

#### *Annus Praeturae.*

Eadem est aetatis Praeturae eruendae ratio. Nimirum cum temporis interuallum, quod ab Aedilitate ad Praeturam currebat, biennium necessario contineret, vt CICERO ad Furnium scribit,<sup>2)</sup> ita, vt nemo hanc petere posset, nisi qui duos annos (qui erant tricesimus octauus ac nonus aetatis) aedilitius fuisset, facile

d) CICERO in *Or. in Pison.* cap. I. et alibi. Conf. CORRADI *Quaestura*, P. I. p. 59. edit. Ernest. et FAERICIVS in *Hist. Cicer.* ad a. 37. et 38.

e) Quod cum aliis probauit GRVCHIVS l. c.

a) CICERO ad *Famil.* lib. X. ep. 25.

facile intelligitur, legitimum Praeturae annum habitum esse quadragesimum. Atque hoc anno Cicero Praetor designatus est. <sup>b)</sup> Itaque non audiendus LIPSIUS, qui ex male intellecto DIONIS loco <sup>c)</sup> annum XXX. Praeturae adseruit. Apud DIONEM quidem haec leguntur: Ταμειυσαντες δε και αγορανομησαντες, η δημαγευσαντες στρατηγειωσαν τριακονtoutαι γινόμενοι. At haec ibi non narrantur, ut de vero more ac instituto in republica Romana, sed verba sunt Agrippae adhortantis Augustum et significantis, quomodo prudentet moderanda sit respublica, et quae noua instituta ei conueniant, in quibus etiam hoc ponit, ut Praetores fiant tricenarii, functi antea Quaestura, et Aedilitate, et Tribunatu. Hoc autem consilium vim legis Romae vnquam accepisse, nullibi reperies.

## §. XI.

### *Aetas Consularis.*

Iam ad honorum fastigium peruenimus, in quo summa dignitas ac maiestas posita erat, Consulatam, qui non nisi viris spectatae virtutis et reliquorum magistratuum functione claris, quibus gerendis et auxerant prudentiam suam, et declarauerant, committi solebat. Horum autem ea aetas desiderabatur, quae abesset quidem a iuuenili calore, at coniuncta tamen cum vigore virili. Indicat illam quam accuratissime CICERO his verbis: <sup>a)</sup> *Quid Macedo Alexander? cum ab ineunte aetate res maximas gerere coepisset, nonne tertio et tricesimo anno mortem obiit? quae est aetas nostris legibus decem annis minor, quam consularis.* Ergo aetas consularis anno XLIII. definita. Vbi inprimis notari debet, suffecisse, si quis intra annum, quo gereret Consulatam, agere inciperet annum tertium post quadragesimum, modo non peteret

b) Conf. CORRADVS l. c. p. m. 65. et 69. et FABRICIVS ad a. Cicer. XL.

c) DIO lib. LII. c. 21.

a) CICERO Philipp. V. c. 17.

teret ante secundum initum, quod vel Caesaris exemplo MANVTIVS ac GRVCHIVS demonstrant. Quid? is etiam suo anno Consulatum gessisse intelligitur, qui sub finem anni XLIII. eum iniit, vt Cicero, cuius Consulatus tres tantum vltimos anni XLIII. dies attigit, cum reliquum tempus anno XLIV. traduxerit, probante MANVTIO. Quamuis nollem huc referre, quod de se ipse dixit: <sup>b)</sup> *Se petiisse Consulatum, cum primum licitum fuerit*, et paulo post: *Se hoc honore anno suo affectum esse*. Mallem haec cum GRVCHIO de necessario Praeturam inter ac Consulatum interuallo interpretari. Nam si aetatem spectamus, potuit integro fere anno prius petere ac gerere, siquidem petere anno XLII. et capere anno XLIII. ineunte fas erat. Si vero ad legitimum interuallum respicimus, recte hoc dixit. Nam cum finis Praeturae in vltimam anni illius XLI. partem caderet, non poterat sane prius, quam expleto fere XLIII. anno, Consulatum inire. Quae quidem explicatio nobis admodum videtur probabilis.

## §. XII.

*Censor. Dictator. Magister equitum. Interrex.*

Hi vero sunt magistratus, quos fere non nisi post Consulatum capere licuit, quamuis more potius, vt videtur, quam lege annali, quae singulis honoribus certum annum praescripsit, quem in his magistratibus frustra quaesueris. Videamus tamen, quid more obtinuerit de singulorum aetate. Ac de Censura quidem constat, eam a solis consularibus viris, hoc est, post annum demum tertium et quadragesimum geri potuisse. Vnde LIVIVS de P. Licinio Crasso, qui Q. Fabio Maximo V. et Q. Fulvio Flacco III. Coss. Censor fuerat, non sine admiratione scribit: <sup>a)</sup> *Crassus*

<sup>b)</sup> CICERO *Or. Agrar.* II. c. 2.

<sup>a)</sup> LIVIVS lib. XXVII. cap. 6. Simile exemplum paulo post in cap. 13.

occurrit, de quo conf. EBERLINVS *de Orig. Iur. et magistrat.* cap. XV. n. 25.



*sus Licinius, qui nec Consul, nec Praetor antea fuerat, quam Censor est factus, ex Aedilitate gradum ad Censuram fecit; ut significet, accidisse praeter consuetudinem, ut aliquis ante Consulatum ad Censuram vocaretur. At post bellum inprimis Punicum secundum ab hac aetate nunquam recesserunt, ut notat LIPSIUS.<sup>b)</sup> Eadem dignitate et Dictatorem insignem desiderarunt Romani, quod cum plurima exempla declarant, tum clarissime LIVIUS indicat, qui de ritu Dictatoris creandi deque primo Dictatore exponens: *Consulares, inquit,<sup>c)</sup> legere, ita lex iubebat, de Dictatore creando lata.* Ex quo loco etiam hoc discimus, morem creandi Dictatorem ex consularibus, ex lege annali haud descendere. Idem fere in comite eius ac administro, Magistro equitum, observatum, quem vel e consularibus viris, vel e praetoriis lectum esse, historia comprobat. Interrex vero, ne hunc omittamus, e Senatoribus prodebatur, quod satis notum est, et, ut videtur, e principibus viris. Sed quales hi? Consulares, credo, aut praetorii. Ex his igitur, quae diximus, et Censoris, et Dictatoris, et Magistri equitum, et Interregis legitimam aetatem colligere licet.*

## §. XIII.

*Vigintiuiratus. Praefectura urbis Latinarum feriarum caussa.*

A summis honorum gradibus descendimus, vel transilimus potius ad infimos magistratus, in quibus magis celebrati sunt Vigintiuiratus et Praefectura urbis Latinarum feriarum caussa, quorum etsi nulla ratio habita est in lege annali, fuit tamen ex more certa aliqua aetas observata, qua capi solerent. Erat utrumque munus legitima quasi via ad superiores honores, ut antea diximus. Quapropter neutrum captum, nisi fere ab adolescentulis, qui fu-

turos

b) LIPSIUS *de magistrat. Rom.* c) LIVIUS lib. II. cap. 18.  
cap. XVIII.

turos honores vellent sibi parare. Vigintiuiratum iam anno aetatis vicesimo geri potuisse, ex veteri titulo apud GRUTERVM<sup>a)</sup> colligitur:

Q. IVL. CLARO. C. V. IIII. VIR.

VIARVM. CVRANDARVM.

ANN. XXI.

Q. IVL. NEPOTIANO. C. V.

IIII. VIRO. VIARVM. CVRAN

DARVM. ANN. XX.

CALP. SABINA. FILIIS.

Frustra dissentit SIGONIVS,<sup>b)</sup> huic magistratui gradum post Quaesturam assignans. Aut enim fides huius tituli in dubium vocanda, aut falsa SIGONII coniectura; licet facile concesserim, interdum etiam quaestorios in Vigintiuiris, cum ita placeret, fuisse, praesertim in Decemuiris litibus iudicandis, qui erant in his primarii, et de quibus solis ille dixit. Certius quid de Praefecto vrbi Latinarum feriarum causa statui potest, quod munus nobili plerumque adolescenti committi solebat. Hunc enim ex ea aetate factum esse, quae non erat senatoria, GELLIUS auctor est.<sup>c)</sup> Quod si igitur, ut censent viri docti, legitima Senatoris aetas anno XXV. definita fuit, nemo non videt, Praefectum vrbi in feriis Latinis eum semper constitutum fuisse, qui XXV. annum nondum attigisset. Ante annum tamen XX. aut certe

a) GRUTERI *Thesaur. Inscript.* p. CCCCXXIII.

b) SIGONIVS *de iudic. pop. Rom.* lib. I. cap. 8.

c) GELLIUS *Noct. Attic.* lib. XIV. cap. 8.

certe XVIII. (hic enim plenae pubertatis terminus) hoc magistratu fungi haud licuisse, arbitror. Ita vero, quae de lege Villia ac singulorum magistratuum aetate dici vel poterant, vel debebant, ni fallor, expediimus. Restat, ut, quid post Villium sancitum sit, aut inualuerit, explicemus.

## §. XIV.

*Lex Pinaria annalis.*

Est igitur a nobis commemoranda lex Pinaria, de qua fere omnia incerta. Solus enim eius mentionem facit C I C E R O his verbis: <sup>a)</sup> *Vt olim Rusca, cum legem ferret annalem, dissuasor M. Seruilus: Dic mihi, inquit, M. Pinari, num, si contra te dixerō, mihi male dicturus es, ut ceteris fecisti? Ut se mentem feceris, ita metes, inquit.* Inde vero cognoscimus quidem nomen auctoris, sed, quis fuerit M. ille Pinarius Rusca, et quando vixerit, id nescimus cum ignarissimis. Fuerunt namque multi Pinarii gestis honoribus clari, in his M. Pinarius Posca, qui a. v. DLXXII. Praetor Sardiniam tenuit, cui GLANDORPIVS<sup>c)</sup> legem nostram tribuit, et, cum sibi obstare videat C I C E R O N E M, qui *Ruscā* appellauit, *Posca* ibi legendum censet, at hoc quidem sine librorum auctoritate: quam ob causam haec opinio nobis minime probatur. P I G H I V S<sup>d)</sup> vero Pinarium hunc *Ruscā*, legis annalis rogatorem, Tribunum plebis facit, eique annum urbis DCXXII. adsignat, at cuius fide, ignoro. Nobis tamen de auctore huius legis atque aetate duo videntur verisimilia, alterum, quod ille fuerit Tribunus plebis, si verum est, quod vulgo traditur, et ex nominis numero eruitur, signum: alterum, latam esse post legem Villiam, siquidem

D 2

com-

a) C I C E R O *de Orat.* lib. II. cap. 65. *Hist. Rom.* f. v. *Pinarii*, p. 681.

b) L I V I V S lib. XL. cap. 18.

d) P I G H I V S in *Annal. Rom.* ad a.

c) G L A N D O R P I V S in *Onomast.* v. 622. T. III. p. 16.

comperimus, PIGHIVM non facile coniecturas admisisse, quae omni careant fundamento, licet earum non semper reddiderit rationes. Hoc autem certissimum ex CICERONE, eam non sine magna contentione fuisse perlatam, M. Seruilio dissuadente. At de argumento legis atque capitibus quaerenti, vix est, quod respondeamus, praeter hoc, egisse de magistratuum aetate. Fuit enim *annalis*, ut vocat TVLLIVS. Forte, si fas est coniectura rem expedire, legitimum Quaesturae annum ita mutavit, ut, cum antea non nisi decem stipendia meriti anno XXVII. capere possent, nunc iis quoque, qui inferiores magistratus gessissent, iam anno XXV. ea contingeret. Sed mera est diuinitio, quam pertinaciter propugnare vix auderemus.

### §. XV.

#### *Solutio legibus annalibus facta libera republica.*

In his autem ipsis legibus annalibus obseruandis tantum abest, ut summus fuerit Quiritium rigor, et expers omnis indulgentiae, ut potius, cum legitimam adesse causam, intelligeret populus Romanus, lege posthabita, gratiam saepe fecerit candidato nondum maturo ob aetatem. Ac profecto, cum iuuenum quorundam temeritas legibus annalibus olim condendis causam dedisset, <sup>a)</sup> quid sapientius, quam neglectam esse legem, ubi deesset ratio? Quapropter, cum iuuenem forte magno ingenio eximiaque virtute excellentem, rebusque supra aetatis spem praeclare gestis celebratum viderent, talem annorum necessitate liberare, et summis in republica honoribus, tamquam iustis virtutis praemiis, ornare non dubitarunt, quandoquidem ab excellenti eximiaque virtute, ut ait TVLLIVS, progressum aetatis expectari non oportet. Cuius rei firman-

dae

<sup>a)</sup> CICERO *Philipp.* V. cap. 17.

das causa nos illustriora quaedam exempla proponemus: nam plura non possumus ob breuitatem. Notatu profecto dignum, quod maiori Scipioni Africano, cum Aedilitatem curulem admodum iuuenis, sed bellica virtute iam clarus, peteret, euenit, de quo ita LIVIVS: <sup>b)</sup> *Huic petenti Aedilitatem cum obfisterent Tribuni plebis, negantes, rationem eius habendam esse, quod nondum ad petendum legitima aetas esset: Si me, inquit, omnes Quirites Aedilem facere volunt, satis annorum habeo. Tanto inde fauore ad suffragium ferendum in tribus discursum est, ut Tribuni repente incoepto destiterint.* Illud vero inauditum in Romana republica, quod de huius nepote per adoptionem, Scipione Africano Aemiliano, dicto Numantino, Liuii Epitomator refert: <sup>c)</sup> *P. Scipio Aemilianus, cum Aedilitatem peteret, Consul a populo dictus, quoniam per annos Consuli fieri non licebat, cum maximo certamine, suffragantibus plebeiis, et repugnantibus aliquamdiu patribus, legibus solutus, et Consul creatus est.* Quid autem magis abhorret a moribus Romanis, quam iuniori nec petenti supremum dari magistratum? Hinc, quanti fecerit Aemilianum populus Romanus, licet aestimare. Memorabile etiam Cn. Pompeii Magni exemplum, qui, ut scribit CICERO, <sup>d)</sup> *legibus solutus Consul ante factus est, quam ullum alium magistratum (curulem intellige: ita enim nos interpretamur) per leges capere licuisset.* Nec denique praetereundum, quod de P. Licinio Crasso LIVIVS narrat, <sup>e)</sup> eum, cum antea nec Consul, nec Praetor quidem fuisset, statim ex Aedilitate gradum ad Censuram fecisse. Ex more enim Censores non nisi fere e Consularibus creabantur. Plura exempla qui desiderat, adeat ipsos rerum Romanarum scriptores.

D 3

Nostri

b) LIVIVS lib. XXV. cap. 2.

c) Epitom. Liui. lib. L.

d) CICERO pro lege Manil. cap. XXI.

e) LIVIVS lib. XXVII. cap. 6.

Nostri erat, ea tantum commemorare, in quibus singulare quid deprehendisse videbamus.

### §. XVI.

*Legum annalium sub principibus conditio.*

Paulo maior tandem sub principibus euasit leges annales posthabendi licentia. Quod quidem duplici ratione factum est, cum aut ex legis beneficio certum hominum genus ante legitimam aetatem magistratus caperet, aut singulis personis annorum numerus remitteretur. Prius est ex lege Papia Poppaea, a. v. DCCLXII. lata, in cuius capite octauo, si recte collocauit HEINECCIUS, <sup>a)</sup> *petentibus honores singuli anni per singulos liberos demissi sunt*, UT VLP IANVS <sup>b)</sup> indicauit. Fuit ergo hoc cum multis aliis της πολυτεχνιας praemium, ut, qui liberis operam dedissent, honores tot annos citius, quam per annarias leges liceret, sine fraude petere possent, quot iis liberi essent superstites. Vnde trium liberorum patri anno XXXIX. duorum anno XL. vnius vero filii aut filiae anno XLI. Consulatus candidatum se profiteri licuit. Ita etiam in ceteris magistratibus. Cui sanctioni cum postea fraudes fierent, fictis praesertim adoptionibus, C. Memmio Regulo et Virginio Rufo Coss. a. v. DCCCXV. censuit, *ne simulata adoptio in vlla parte muneris publici iuuarét.* <sup>c)</sup> Ex quo tempore nec in honoribus ante legitimam aetatem petendis, nec in amoliendis muneribus publicis profuerunt liberi adoptiui. Alterum, quod diximus, in singulis personis leges annales neglectas fuisse, cum ad illos pertinet, qui legibus soluti sunt a Senatu, tum ad eos, qui etiam  
sine

a) HEINECCIUS in *Comment. ad Leg. Iul. et Pap. Popp.* lib. II. cap. VII. §. 3. p. 201. et Pap. in cap. II. π. de minor. Conf. omnino HEINECCIUS l. c. p. 201. sq.  
c) TACITVS *Annal.* lib. XV.  
b) VLP IANVS lib. XIX. ad leg. Iul. cap. 19.



sine Senatus priuilegio solo principum iussu summos honores ante legitimum tempus obtinuerunt. Idque maxime apparet in filiis principum ac amicis, qui vel plane non, vel dicis causa legibus soluti, admodum iuuenes, imo pueri magistratus gesserunt. Horum exemplis abundat historia, ex quibus nonnulla tantum seligere nobis est animus. Ac Quaestores quidem multi fuerunt vel ineunte adolescentia, ut *Tiberius*, qui anno XIX.<sup>d)</sup> *Caligula*, qui quinquennio maturius legitima aetate,<sup>e)</sup> *Antoninus Philosophus*, qui anno XVIII.<sup>f)</sup> *Iulianus*, qui ante annum, quam legitima aetas sinebat,<sup>g)</sup> hunc magistratum ceperunt. Praetoram *Plinius* consecutus est, cum ei Caesar annum remisisset, ut ipse ad Fabatum scribit.<sup>h)</sup> Consulatum vero principum aetate etiam XX. annis minoribus interdum contigisse, VLP-PIANVS haud obscure docet.<sup>i)</sup> Nec desunt exempla. Sane *Augustus*,<sup>k)</sup> nec non *Nero*<sup>l)</sup> anno XX. *Commodus* iuuenis adhuc, cum veniam legis annariae impetrasset,<sup>m)</sup> *Pertinax*, cum signifer militaret,<sup>n)</sup> *Geta*, Seueri filius, minor adhuc et paulo post virilem togam captam,<sup>o)</sup> Consules facti sunt. Nec filios, pueros adhuc, consulari dignitate insignire, Imperatores dubitarunt, ut apparet ex constitutionibus, quae N. B. P. (nobilissimis pueris) Coss. datae sunt, quales in Theodosiano Codice reperiuntur.<sup>p)</sup> Quid? *Iouianum* non puduit, collegam Consula-

tus

d) VELLEIVS PATERC. lib. II. cap. 94.

e) SVETONIUS in *Calig.* cap. I.

f) IVL. CAPITOLINVS in *Anton.* cap. V. ibique CASAVBONVS.

g) SPARTIANVS in *Iuliano*, cap. I.

h) PLINIUS *Epist.* lib. VII. ep. 16.

i) VLPIANVS lib. II. *de Offic. Conf.* in cap. vn. §. 2. π. *de offic. Conf.*

k) SVETONIUS in *Octau.* cap. XXVI.

l) TACITVS *Annal.* lib. XII. cap. 41.

m) LAMPRIDIUS in *Commodo*, cap. II.

n) CAPITOLINVS in *Pertinace*, cap. II.

o) SPARTIANVS in *Seuero*, cap. XIV.

p) L. IV. C. Th. *de proxim. Comit. disposit.* L. IX. et X. C. Th. *de veteran.*

tus sibi iungere filium *Varronianum*, infantulum, qui, quo minus ipse, dum ambo more maiorum Consulatum inirent, sella veheretur curuli, vagitu suo prohibuisse legitur. <sup>9)</sup> Tanta fuit illorum temporum insania!

## §. XVII.

### *Peroratio.*

Finita igitur est, ni fallor, nostra tractatio, quae a primis fere reipublicae Romanae temporibus orta et ad principes progressa, in infimis paene desit Imperatoribus. Vellem et absoluta esset ac perfecta, quod ingenii est, atque doctrinae, a qua cum nos ob aetatem longe absumus, sicut illo parum instructi, rudem forte ac impolitum hunc libellum prodiiisse, quis miretur? Neque vero hoc solum. Accessit aliud, unde nostrae scriptio- ni infortunium imminebat, impedimentum. Nam cum haec opella ad medium fere esset perducta, subito in morbum incidimus, non tam grauem, quam molestum, qui a labore nos paululum auocauit. Attamen cum tempus edendo huic libello definitum appropinquare intelligeremus, aegrotantes adhuc (hoc enim nobis vitium, ut, quod semel cepimus, consilium vix deferamus) reliquam partem absolueri coacti sumus. Unde factum est, ut et ipse libellus morbosus euaserit; multisque forte, ut fit, maculis deformis in lucem prodierit. Quod ipsum tamen non omni, credo, excusatione indignum est. Nam, qui non aetati nostrae, certe morbo indulgebunt.

9) AMMIANVS MARCELL. *Histor.* lib. XXV.





